

Эгл кӧдлӧч—ах йосна элчд

Элстин автобазин коллективд болсн Хальмг АССР-н Деед Советд депутатин кандидат заадж темдглгънд нерӧдсн хург болв. Хургиг Хальмг автотрестин директор ур Б. И. Баринов секв.

Хургт бухгалтер ур Терешенко И. В. уг авад:—Би, Хальмг республикин ах йоснд Элст балгъсна Клыковск округар шофер Железняк Иван Григорьевичиг илгӧхми гидж нерӧдджӧнӧв. Ур Железняк 1915 джил Ставропольск крайнч Ипатово селӧнд, угатя Орк-булд тӧрсми. Коллективизац болхд эцктӧгъӧн хамдан, тӱрӱн улсин неги болдж, колхозд орсмн.

1934 джилӧс авн Элст балгъснд эн кӧдлӧ. Алдр Тӧрскин дӧӧнӧ джилмӱдт ур Железняк Советск Цергин зергӧлӧнд—эклцӧснь сӱл кӱртлинь гартан зер-зев авч, алач-махч фашистриӧс энъкр Тӧрскӧн парсдж ноолдла.

1946 джилӧс авн 1956 джил кӱртл ур Железняк АТК-д кӧдлӧд, теруӧнӧ хӧбннь мана автобазд орв. Эн йир шундж кӧдлӧг шофер, машигъӧн керсӧд чигн оньган ӧгч хӧлӧгъӧд, цагтнь кергтӧ ясвринь ӧгнӧ.

Тегӧд чигн эн зурагъан тоннар 169 процент, тонн-километрӧр 174 процент кӱцӧв.

Ур Железняк мана даалгъвриг ӧрунӧр кӱцӧхнь лавта, тегӧд мини селвгиг дӧнънтхӧ гидж тадниг дуудджанав—гидж угӧн чилӧв.

Механик Терешенко Д. К. уг авб. Эн, ур Железнякиг йир сӧӧнӧр медлв, юнъгад гихлӧ, бидн хамдан кӧдлдвдн. Эн болхла улгӱр болм кӧдлмштӧ, унн седклӧн даалгъсн кергт ӧгдг ур. Тегӧд би ур Железнякиг республикин Деед Советд депутатин кандидат темдглсиг дӧнънджӧнӧв—гидж келв.

Месткомин ахлач, шофер Клейнер В. Н., ур Железняк мана итклтӧ ур, сӧн кӧдлмшч, ах йоснд бас сӧн элч болхнь лавта—гидж келв. Тегӧд ур Клейнер сунъгъврин ӧдр кӱртл джилӧ зурагъан кӱцӧх даалгъвр авб.

Дарунь ур Бадугинов, ур Гуренко, ур Бабаков эдн босдж келӧл, ур Железнякиг депутатин кандидатд темдглсиг дӧнънӧд, социалистическ ӧбдӧн даалгъвр авч, цуг уурмӱдӧн дуудв.